



Formasaun Forense ba Investigadór Direitus Umanus



» UNMIT Photo/Martine Perret

“Siénsia forense tulun investiga, interpreta no dezenvolve justisa.” esplika patolojista forense, Dr Nurul Islam, ba funsionáriu na’in-14 husi Provedoria Direitus Umanus no Justisa (PDHJ) ne’ebé tuir hela ninia sesaun formasaun.

Ohin maka loran primeiru husi kursu loran tolu nian, ne’ebé PNUD hala’o ho objetivu atu tulun membru sira husi ekipa investigasaun direitus umanus nian atu hetan koñesimentu báziku kona-ba siénsia forense.

“Maizumenus 60% husi keixa hotu ne’ebé ema hato’o ba PDHJ relaciona ho ninia mandatu ba direitus umanus. Dezde 2005 PDHJ simu keixa 250 resin kona-ba violasaun direitus umanus”, Alison Ryan, PNUD nia jestór projetu, dehan.

Importante tebes katak PDHJ nia investigadór sira direitus umanus nian iha koñesimentu

kona-ba téknika siénsia forense oioin no bele aplika koñesimentu ne’e bainhira halibur no

analiza evidénsia.

Naasson Sarmento serbisu nu’udar investigadór direitus umanus nian iha PDHJ. Nia dehan katak introdusaun kona-ba siénsia forense iha valor boot tebes ba ninia serbisu:

“Dala barak ha’u simu relatóriu médiku husi kazu ne’ebé investiga hela. To’o agora difisil tebetebes atu kompriende konteúdu no interpreta rezultadu sira. Agora ha’u bele kompriende terminolojia forense no hatene asuntu sira ne’ebé prezisa klarifikasaun”.

Importante mós katak funsionáriu PDHJ hatene oinsá tenke halibur no dokumenta evidénsia bainhira hetan pedidu atu investiga sena akontesimentu ida, porezemplu hasai fotografia ne’ebé ezatu no sukut kanek sira. Ida-ne’e nu’udar informasaun krusial ba investigasaun iha tempu oin mai.

Karlheinz Gortano mak Mentór Investigasaun PNUD nian, ne’ebé serbisu hodi hasa’e kapasidade funsionáriu sira iha PNUD:

“Investigadór sira iha PDHJ uluk kaer kazu ida ne’ebé sidadaun ida akuzá katak polisia ida halo agresau hasoru nia. Infelizmente iha momentu nia hato’o keixa sira la hasai fotografia ho maneira adekuada ba ninia isin-fitar iha baku-fatin. Klaru katak ida-ne’e hamosu problema boot iha faze tuir mai husi investigasaun, hafoin evidénsia fiziku komesa lakon ona” Formandu ida fali, Paulo Ribeiro, ne’ebé xefe husi eskritóriu PDHJ nian iha Oekusi, hanoin katak formasaun ne’e valiozu

duni ba funsionáriu sira ne’ebé koloka ba distritu: “Nu’udar investigadór iha terrenu ami dala barak hasoru difikuldade atu konvense ema atu hetan ezame médiku iha ospital. Agora ami iha abilidade atu prezerva no halibur evidénsia bainhira nesesáriu”.

Kursu ne’e inklui vizita ida ba Ospital Nasionál hodi haree instalasoin no ekipamentu ne’ebé disponivel ba departamentu medicina forense, no mós apresentasaun husi doutór kubanu sira ida kona-ba prosedimentu autópsia ba ema ne’ebé mate iha sirkunstánsia suspeita. Durante tinan 10 ikus ne’e iha kazu autópsia 1,000 resin iha Timor-Leste.

Maski nune’e, Dr Nurul Islam, mak patolojista forense iha Ekipa Investigasaun Krime Grave ONU nian, fó-hatene PDHJ nia funsionáriu sira katak siénsia forense la’ós preokupa de’it ho kazu sira-ne’ebé envolve ema mate. Porezemplu, halibur vestíjius husi vitima ne’ebé hetan violasaun seksuál, bele tulun hodi identifika atakante no lori nia ba justisa.

Provedór Interinu, Dr Rui Pereira dos Santos, laran-ksolok katak ninia funsionáriu sira hetan oportunidade atu tuir kursu ne’e:

“Formasaun ne’e importante tanba subliña siénsia forense nia podér, no demonstra oinsá aplikasaun pratika husi siénsia ida-ne’e bele tulun PDHJ hala’o ninia papél nu’udar Timor-Leste nia organizasaun nasional independente ne’ebé tau matan ba direitus umanus”.

Aniversáriu FALINTIL ba Da-35



» UNMIT Photo/Bernardino Soares

Aniversáriu da-35 formasaun ba Forsa Armada ba Libertasaun Nasionál Timor-Leste nian - Forças Armadas da Libertação Nacional de Timor-Leste (FALINTIL) Komemora tiha ona iha

loron 20 fulan-Agostu. FALINTIL estabelese iha loron 20 fulan-Agostu tinan 1975, no dissolve iha loron 1 fulan-Fevereiru tinan 2001. Iha tinan 2002 forsa armada ofisial Timor-Leste ne’ebé foin mak ukun, hanaran Forsa de Defesa de Timor-Leste (F-FDTL)

Hodi fó ónra ba aniversariu ne’e, Governu Timor-Leste hala’o tiha atividade hirak iha Pálasiu Governu iha Dili, inklui mós iha seremónia ida-ne’e, ne’ebé Prezidente Jósé Ramos-Horta, Primeriu Ministru Xanana Gusmão no RESJ-ONU nian Ameerah Haq, karii ai-funan ba iha tasi laran iha Pálasiu Governu nia oin.

Korrída bisikleta anuál daruak nian



Korrída bisikleta Tour de Timor anuál daruak nian sei hala’o iha loron 13-17 fulan-Setembru.

Prekursu ba korrida bisikleta ne’e sei hala’o liuhosi distritu osidentais nasaun nian ne’ebé difisil tebes, sei hahú hosi distritu Dili liu ba Balibo, Suai, Ainaro, Aileu no filafali mai iha Dili.

Korrída inagurál tinan kotuk nian atrai tiha atensaun barak hosi siklista profesionais internasionál sira hodi partésipa iha eventu ne’e.

Tour de Timor ne’e organiza hosi Gabinete Prezidente nian.



Loron Internasionál Espesiál ba Juventude

Foin lalais ne'e Timor-Leste komemora tiha loron dahuluk ba Tinan Internasionál Juventude nian, ne'ebé hahú tiha iha loron 12 fulan-Agostu. Loron ne'e iha signifkadu espesiál ba Timor-Leste tanba nu'udar hatene nanis katak hanesan nasaun ne'ebé ho ninia populasaun joven barak liu iha mundu ne'ebé kuaze metade hosi Timoroan sira mak ho tinan 18 ba kraik.

Ho populasaun ne'ebé mak joven no boot daudaun, Timor-Leste tenke determina ona saida maka juventude sira ninia papél hodi dezempeña ba nasaun ne'e no iha prosesu harii estadu. Ho esforsu atu aproveita enerjia, imajinasaun, no inisiativa hosi joven sira iha mundu nian hodi hakat liu dezafiu hirak ne'ebé umanidade hasoru.

Inagura tiha ona iha Dili Parlamentu Juventude Timor-Leste



» UNMIT Photo/Martine Perret

Parlamentu Juventude Nasionál inagura tiha ona iha Dili. Liu joven deputadu ema na'in-130, ho tinan 12-17 ne'ebé selesionadu hosi sub-distritu 160 hodi tuur iha parlamentu ne'e. Hetan apoiu hosi UNICEF, Deputadu sira-ne'e submete tiha ba treinamentu loron tolu kona-ba lideransa no sidania no hein katak sira sei bele reprezenta juventude nia hanoin no atu bele involve ho ukun-nain sira hodi fasilita atu inklui mós juventude sira-nia lian iha dezenvolvimentu nasional.

Halibur Joven Timoraon sira liuhosi dansa

Membru sira hosi Movimento Adolcente Crianca, apresenta tiha dansa Capoeira, formasaun arte Afro-Brazileiru nian ida ne'ebé kombina elementu sira hosi arte marsiais, múzika no dansa. Kompostu hosi feto-klosan no mane-klosan ema na'in-74 ho tinan entre 11-12, MAC nu'udar ONG foin-sa'e ida ne'ebé promove direitu labarik-nian liuhosi arte sira. Téknika dansa no akrobátiku ne'ebé uza, ne'e hanesan dalan ida atu hanorin dixiplina, respeitu no unidade entre juventude Timoroan sira.



» UNMIT Photo/Martine Perret

Ró-ahi Mercy fornese tratamentu ba Timoroan sira

Ró-ahi Mercy sai tiha ona hosi Dili iha loron 24 fulan-Agostu, hafoin fornese tiha servisu importante sira médiku nian ba Timoroan sira iha Dili no distritu. Tratamentu hirak ne'e saugate no disponivel ba ema Timoroan hotu ne'ebé hetan rekomendasaun hosi doutór sira hodi bá iha Ró-ahi ne'e. Pesoais sira hosi Ró-ahi Mercy ne'e halo vizita bá iha klínika hirak iha nasaun laran tomak hodi hetan rekomendasun no fornese transporte ba pasiente hosi distritu.

Tratamentu balu maka inklui hanesan Sirur-

jia, hodi halo tratamentu katarata, no érnia, no tratamentu ne'ebé kompleksu liu ba pasiente kankro sira.

Ró-ahi Mercy ne'e hala'o viazen hale'u mundu tomak hodi fornese servisu moves médika nian, inklui fasilita médika sirurjia ba grave nian to'o

asisténsia dizaster no operasaun umanitaria nian iha mundu tomak. Servisu balu ne'ebé oferese hosi Ró-ahi ne'e mak inklui sirurjia, klínika kuidadu saúde primariu nian, klínika nehan, medisina preventiva, no kuidadu ba veteranariu.

Ró-ahi Mercy ne'e ikusliu mai Timor-Leste iha tinan 2008 nu'udar parte ida hosi misaun asisténsia umanitariu no sivil nian iha Sudeste Aziátiku no Oseania tomak.



» UNMIT Photo/Bernardino Soares

Juventude Timor nia hanoin kona-ba selebrasaun Loron Internasionál ba Juventude

Natalina Beliana
Hosi Grupu Fini Kreatifu Dili



// Nu'udar joven ida, Ha'u sente haksolok hodi akompaña Loron Internasionál ba Juventude ne'e. Bainhira ita hakarak dezenvolve ita-nia nasaun ne'e ita prezisa mai hamutuk hodi dezenvolve ita-nia nasaun ne'e

ba futuro. Ita prezisa hadook an tiha hosi violénsia no hela hakmatek iha familia nialaran. Bainhira ita halo ida ne'e, sertamente ita sei halo duni pás iha comunidade no tulun hodi kontribui ba dezenvolvimentu ita-nia futuro. //

Luis Takur
Hosi Sub-Distritu Baguia Distritu Baukau



// Juventude sira iha Timor-Leste hatene loloos katak lori tempu naruk hira maka luta ba independénsia ne'e. Independénsia ne'e mós ita manán tiha tanba kontribuisaun hosi juventude sira. Juventude sira iha oportunidade atu halo reflesaun kona-ba kontribuisaun saida mak ita bele halo ba buat hirak ne'ebé hanaran "dezenvolvimentu". Ha'u fiar katak joven hotu-hotu – hosi área rurais no sidade sira – iha papél ida hodi tulun atu lori nasaun ne'e ba oin no kontribui ba dezenvolvimentu. //

Rona Futuru Nabilan

Programa regular radio UNMIT kada Sábado oras 5:30 Lokraik no Domingo oras 6:00 kalan iha RTL no radio comunidade 15

Haree ba pás

Programa regular TV UNMIT kada semana rua iha Segunda 7:30 kalan iha TVTL

